



DIKELUARKAN OLEH JABATAN MUFTI PERLIS

ISLAM MENGAJAR CARA BERDOA YANG DIMAKBULKAN

(TEKS KHUTBAH JUMAAT 8 OGOS 2025 MASIHI / 14 SAFAR

1447 HIJRAH)

ISLAM MENGAJAR CARA BERDOA YANG DIMAKBULKAN

الْحَمْدُ لِلَّهِ نَحْمَدُهُ وَنُسْتَعِينُهُ وَنَسْتَغْفِرُهُ وَنَعُوذُ بِاللَّهِ مِنْ شُرُورِ أَنْفُسِنَا وَمِنْ سَيِّئَاتِ
أَعْمَالِنَا، مَنْ يَهْدِهِ اللَّهُ فَلَا مُضِلَّ لَهُ وَمَنْ يَضِلَّ فَلَا هَادِيَ لَهُ، أَشْهَدُ أَنْ لَا إِلَهَ إِلَّا
اللَّهُ وَحْدَهُ لَا شَرِيكَ لَهُ، وَأَشْهَدُ أَنَّ مُحَمَّدًا عَبْدُهُ وَرَسُولُهُ. اللَّهُمَّ صَلِّ وَسَلِّمْ عَلَى
مُحَمَّدٍ وَعَلَى آلِهِ وَأَصْحَابِهِ وَمَنْ تَبِعَهُمْ بِإِحْسَانٍ إِلَى يَوْمِ الدِّينِ. يَا أَيُّهَا الَّذِينَ آمَنُوا
اتَّقُوا اللَّهَ حَقَّ تُقَاتِهِ وَلَا تَمُوتُنَّ إِلَّا وَأَنْتُمْ مُسْلِمُونَ. أَمَّا بَعْدُ، فَإِنَّ أَصْدَقَ الْحَدِيثِ
كِتَابُ اللَّهِ، وَخَيْرُ الْهَدْيِ هَدْيُ مُحَمَّدٍ صَلَّى اللَّهُ عَلَيْهِ وَسَلَّمَ، وَشَرُّ الْأُمُورِ مُحَدَّثَاتُهَا،
وَكُلُّ مُحَدَّثَةٍ بِدْعَةٌ، وَكُلُّ بِدْعَةٍ ضَلَالَةٌ، وَكُلُّ ضَلَالَةٍ فِي النَّارِ.

Sidang Jumaat Yang Dirahmati Allah,

Marilah kita meningkatkan ketakwaan kepada Allah dengan bersungguh-sungguh melaksanakan segala perintah-Nya dan meninggalkan segala larangan-Nya. Khutbah pada hari ini bertajuk: **"ISLAM MENGAJAR CARA BERDOA YANG DIMAKBULKAN."**

Sidang Jumaat Yang Dikasihi Allah,

Doa adalah ibadah yang sangat agung dan amat dicintai oleh Allah SWT. Ia adalah bentuk pengabdian yang mendekatkan seorang hamba kepada Tuhannya. Nabi SAW bersabda:

الدُّعَاءُ هُوَ الْعِبَادَةُ

Ertinya: **"Doa itu adalah ibadah."** (Hadis Sahih Riwayat al-Tirmizi)

Ini menunjukkan bahawa doa bukan sekadar permintaan, tetapi hakikatnya adalah bentuk pengabdian kepada Allah yang paling ikhlas. Ia adalah pengakuan bahawa kita ini lemah dan Allah Maha Berkuasa atas segala sesuatu. Doa adalah lambang ketundukan, kerendahan diri dan pengharapan yang ikhlas kepada Allah. Apabila seseorang hamba meninggalkan doa, itu petanda dia sudah mula jauh daripada Tuhannya, bahkan jantung hatinya mungkin telah keras dan kering daripada iman.

Dalam kesibukan mengejar urusan dunia, ramai yang terlalu bergantung kepada usaha dan ikhtiar semata-mata, tetapi lalai daripada berdoa. Ada juga yang pernah berdoa, namun merasa kecewa apabila permintaan tidak segera diperkenankan, lalu berhenti dan meninggalkan doa. Ini adalah satu kesilapan besar. Allah SWT berfirman dalam Surah Ghafir ayat 60:

وَقَالَ رَبُّكُمْ ادْعُونِي أَسْتَجِبْ لَكُمْ إِنَّ الَّذِينَ يَسْتَكْبِرُونَ عَنْ عِبَادَتِي سَيَدْخُلُونَ

جَهَنَّمَ دَاخِرِينَ ﴿٦٠﴾

Maksudnya: *"Dan Tuhan kamu berfirman: Berdoalah kepada-Ku, nescaya Aku perkenankan bagi kamu. Sesungguhnya orang-orang yang sombong daripada menyembah-Ku akan masuk neraka Jahannam dalam keadaan hina."*

Ayat ini menunjukkan bahawa doa adalah ibadah yang agung. Bahkan meninggalkan doa kerana merasa tidak perlu adalah bentuk kesombongan yang amat dibenci oleh Allah. Oleh itu, jangan sekali-kali kita meremehkan doa.

Sidang Jumaat Yang Dimuliakan,

Islam menganjurkan kita agar sentiasa berdoa dan memperbanyakkan permohonan kepada Allah. Ketika ingin berdoa, hendaklah kita mengetahui cara, waktu, dan tempat yang terbaik untuk berdoa agar ia lebih mudah diperkenankan. Antara perkara tersebut ialah:

Pertama: Berdoa dengan penuh keyakinan bahawa Allah akan memperkenankannya. Doa mestilah dilafazkan dengan jantung hati yang yakin bahawa Allah akan memperkenankan apa yang diminta. Janganlah seseorang itu berdoa dalam keadaan jantung hati yang ragu-ragu

atau lalai. Keyakinan dalam berdoa melambangkan keimanan yang sebenar. Nabi SAW bersabda:

ادْعُوا اللَّهَ وَأَنْتُمْ مُوقِنُونَ بِالْإِجَابَةِ، وَاعْلَمُوا أَنَّ اللَّهَ لَا يَسْتَجِيبُ دُعَاءَ مَنْ قَلْبٍ غَافِلٍ لَّهِ

Ertinya: ***“Berdoalah kepada Allah dalam keadaan kamu yakin akan diperkenankan. Ketahuilah bahawa Allah tidak memperkenankan doa daripada jantung hati yang lalai dan alpa.”*** (Hadis Hasan Riwayat al-Tirmizi)

Yakinlah bahawa Allah Maha Mendengar dan Maha Pemurah. Doa yang dilafazkan dengan penuh keimanan, walau tidak diperkenankan secara zahir, tetap akan diberi ganjaran, diijaukan keburukan, atau ditangguhkan untuk waktu yang lebih baik.

Kedua: Berdoa tanpa tergopoh-gapah menuntut hasilnya. Ramai yang berputus asa dalam berdoa kerana mereka terlalu gopoh mahukan hasil segera. Lalu apabila mereka tidak nampak hasilnya, mereka berkata: ***"Aku sudah berdoa tetapi tidak dimakbulkan,"*** lalu mereka pun meninggalkan doa. Nabi SAW bersabda:

لَا يَزَالُ يُسْتَجَابُ لِلْعَبْدِ مَا لَمْ يَدْعُ بِإِيْمٍ، أَوْ قَطِيعَةٍ رَحِمٍ، مَا لَمْ يَسْتَعْجَلْ قِيلَ: يَا رَسُولَ اللَّهِ مَا الْإِسْتِعْجَالُ؟ قَالَ: يَقُولُ: قَدْ دَعَوْتُ وَقَدْ دَعَوْتُ، فَلَمْ أَرَ يَسْتَجِيبُ لِي فَيَسْتَحْسِرُ عِنْدَ ذَلِكَ، وَيَدْعُ الدُّعَاءَ

Ertinya: ***“Doa hamba akan terus diperkenankan, selagi dia tidak berdoa untuk perkara dosa atau memutuskan silaturrahim, dan selagi dia tidak tergesa-gesa. Para sahabat bertanya: Wahai Rasulullah, apakah maksud tergesa-gesa itu? Baginda bersabda: Dia berkata, ‘Aku telah berdoa, aku telah berdoa, tetapi aku tidak melihat ia diperkenankan,’ lalu dia pun berputus asa dan meninggalkan doa.”*** (Hadis Riwayat Muslim)

Justeru, janganlah kita tergesa-gesa, kerana Allah mengetahui waktu terbaik untuk memperkenankan doa. Sabar dalam berdoa adalah tanda iman yang kukuh dan jantung hati yang berserah kepada kehendak Allah.

Sidang Jumaat Yang Dihormati Sekalian,

Ketiga: Berdoa pada waktu sepertiga malam terakhir. Waktu ini adalah saat yang paling mustajab dan sangat disukai oleh Allah. Ketika manusia lain sedang tidur lena, Allah turun ke langit dunia dan menyeru hamba-hamba-Nya untuk berdoa. Nabi SAW bersabda:

يَتَنَزَّلُ رَبُّنَا تَبَارَكَ وَتَعَالَى كُلَّ لَيْلَةٍ إِلَى السَّمَاءِ الدُّنْيَا حِينَ يَبْقَى ثُلُثُ اللَّيْلِ الْآخِرِ، يَقُولُ: مَنْ يَدْعُونِي فَأَسْتَجِيبُ لَهُ، مَنْ يَسْأَلُنِي فَأُعْطِيهِ، وَمَنْ يَسْتَغْفِرُنِي فَأَغْفِرَ لَهُ

Ertinya: *“Tuhan kita Tabaraka Taala turun ke langit dunia setiap malam, ketika tinggal sepertiga malam terakhir, lalu Dia berfirman: Siapa yang berdoa kepada-Ku, Aku perkenankan baginya? Siapa yang meminta kepada-Ku, Aku beri? Siapa yang memohon ampun kepada-Ku, Aku ampuni?”* (Hadis Riwayat al-Bukhari)

Beruntunglah mereka yang membiasakan diri bangun di waktu malam untuk berdoa dan bermunajat. Itulah saat di mana Allah membuka pintu rahmat-Nya seluas-luasnya.

Keempat: Berdoa ketika sujud dalam solat. Sujud adalah tempat paling hampir antara hamba dan Tuhannya. Ia bukan sekadar posisi dalam solat, bahkan ia adalah saat keintiman rohani yang agung. Nabi SAW bersabda:

أَقْرَبُ مَا يَكُونُ الْعَبْدُ مِنْ رَبِّهِ وَهُوَ سَاجِدٌ، فَأَكْثِرُوا الدُّعَاءَ

Ertinya: *“Saat paling hampir seorang hamba dengan Tuhannya ialah ketika dia sedang sujud. Maka perbanyakkanlah doa ketika itu.”* (Hadis Riwayat Muslim)

Gunakan waktu sujud untuk mengadu dengan sepenuh jantung hati. Doa ketika sujud membawa keberkatan luar biasa, kerana ia disertai dengan rasa kehinaan diri dan ketundukan sepenuhnya kepada Allah.

Kelima: Berdoa dalam keadaan dizalimi. Doa orang yang dizalimi adalah doa yang sangat kuat dan mustajab. Allah tidak akan menolaknya kerana ia datang dari jantung hati yang teraniaya. Nabi SAW bersabda:

وَأَتَّقِ دَعْوَةَ الْمَظْلُومِ، فَإِنَّهُ لَيْسَ بَيْنَهَا وَبَيْنَ اللَّهِ حِجَابٌ

Ertinya: ***“Dan takutlah kamu terhadap doa orang yang dizalimi, kerana tiada hijab antara doanya dan Allah.”*** (Hadis Riwayat Muslim)

Jika kita dizalimi, jangan membalas dengan kezaliman, sebaliknya panjatkanlah doa. Dan jika kita pernah menzalimi orang lain, segera minta maaf dan pulangkan haknya kerana takutkan doa yang keluar dari mulutnya.

Keenam: Berdoa ketika hujan turun. Hujan adalah antara waktu yang disebut dalam hadis sebagai waktu mustajab untuk berdoa. Ia adalah saat di mana rahmat Allah sedang turun ke bumi, dan doa yang dipanjatkan ketika itu lebih dekat untuk dimakbulkan. Nabi SAW bersabda:

وَتَحْتَ الْمَطَرِ

Ertinya: ***“Dan (berdoa) ketika hujan turun.”*** (Hadis Hasan Riwayat Abu Daud)

Ketika hujan turun, angkatlah tangan, lafazkanlah doa dengan penuh harapan, dan mohonlah keampunan, hajat, serta kebaikan dunia dan akhirat. Jangan sekadar melihat hujan sebagai kejadian biasa, tetapi jadikan ia peluang untuk mendekatkan diri kepada Allah.

Sidang Jumaat Yang Dikasihi Sekalian,

Berdoalah tanpa jemu. Jangan tinggalkan doa walau dalam keadaan putus harapan. Kerana selagi seseorang itu berdoa, itu tanda dia masih memiliki pengharapan kepada Allah. Dan selagi pengharapan itu ada, maka rahmat Allah sentiasa dekat. Jadikan doa sebagai rutin, bukan sekadar ketika ditimpa kesusahan. Rebutlah saat-saat mustajab yang telah disebutkan. Jangan biarkan lidah kita kering dari doa, dan jangan biarkan jantung hati kita kosong tanpa pengharapan.

بَارَكَ اللَّهُ لِي وَلَكُمْ فِي الْقُرْآنِ الْعَظِيمِ وَنَفَعَنِي وَإِيَّاكُمْ بِمَا فِيهِ مِنَ الْآيَاتِ وَالذِّكْرِ الْحَكِيمِ.

KHUTBAH KEDUA

الْحَمْدُ لِلَّهِ الَّذِي أَنْزَلَ عَلَى عَبْدِهِ الْكِتَابَ وَلَمْ يَجْعَلْ لَهُ عِوَجًا. وَأَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ وَأَشْهَدُ أَنَّ مُحَمَّدًا عَبْدُهُ وَرَسُولُهُ. اَللّٰهُمَّ صَلِّ وَسَلِّمْ وَبَارِكْ عَلَى مُحَمَّدٍ وَعَلَى آلِهِ وَصَحْبِهِ أَجْمَعِينَ، أَمَّا بَعْدُ: فَيَا أَيُّهَا الْمُسْلِمُونَ، اتَّقُوا اللَّهَ حَقَّ تَقَاتِهِ وَلَا تَمُوتُنَّ إِلَّا وَأَنْتُمْ مُسْلِمُونَ.

Sidang Jumaat Yang Dihormati,

Islam telah menunjukkan kepada kita banyak sebab yang membawa kepada doa diperkenankan. Namun, Islam juga mengingatkan bahawa terdapat halangan-halangan yang boleh menyebabkan doa seseorang tidak dimakbulkan. Antaranya ialah apabila seseorang berdoa tanpa benar-benar bergantung kepada Allah, atau hanya mengingati Allah ketika ditimpa musibah tetapi melupakannya sewaktu senang dan lapang. Rasulullah SAW bersabda:

مَنْ سَرَّهُ أَنْ يَسْتَجِيبَ اللَّهُ لَهُ عِنْدَ الشَّدَائِدِ وَالْكَرْبِ فَلْيُكْثِرِ الدُّعَاءَ فِي الرَّخَاءِ

Ertinya: *“Sesiapa yang suka agar Allah memperkenankan doanya ketika ditimpa kesusahan dan kesempitan, maka hendaklah dia memperbanyakkan doa kepada-Nya ketika waktu senang (lapang).”* (Hadis Hasan, Riwayat al-Tirmizī)

Hadis ini memberi pengajaran bahawa membiasakan diri berdoa ketika waktu senang merupakan tanda keikhlasan dan pergantungan yang berterusan kepada Allah SWT. Sebaliknya, sikap melupakan Allah sewaktu senang dan hanya kembali kepada-Nya ketika terdesak mencerminkan kelemahan dalam hubungan dengan-Nya.

Doa yang lahir hanya ketika susah, tanpa pengabdian sebelumnya, tidak mencerminkan jantung hati yang benar-benar ikhlas dan tunduk kepada Allah SWT. Justeru, marilah kita terus memperbaiki hubungan dengan Allah. Jadikan doa sebagai amalan harian, bukan hanya ketika ditimpa musibah. Doa yang ikhlas dan konsisten adalah lambang ketundukan dan kecintaan kepada Allah sepanjang masa.

Sidang Jumaat Yang Dihormati Sekalian,

Sesungguhnya, Allah SWT berfirman dalam surah Al-Ahzab Ayat 56:

إِنَّ اللَّهَ وَمَلَائِكَتَهُ يُصَلُّونَ عَلَى النَّبِيِّ يَا أَيُّهَا الَّذِينَ ءَامَنُوا صَلُّوا عَلَيْهِ وَسَلِّمُوا تَسْلِيمًا ﴿٥٦﴾

Maksudnya: “*Sesungguhnya Allah dan para malaikat berselawat ke atas Nabi, maka wahai orang-orang yang beriman hendaklah kamu berselawat dan salam ke atas Nabi*”.

اَللّٰهُمَّ صَلِّ عَلَى مُحَمَّدٍ وَعَلَى آلِ مُحَمَّدٍ كَمَا صَلَّيْتَ عَلَى اِبْرَاهِيْمَ وَعَلَى آلِ اِبْرَاهِيْمَ

وَبَارِكْ عَلَى مُحَمَّدٍ وَعَلَى آلِ مُحَمَّدٍ كَمَا بَارَكْتَ عَلَى اِبْرَاهِيْمَ وَعَلَى آلِ اِبْرَاهِيْمَ فِي

اَلْعَالَمِيْنَ اِنَّكَ حَمِيْدٌ مَّجِيْدٌ. اَللّٰهُمَّ اغْفِرْ لِلْمُسْلِمِيْنَ وَالْمُسْلِمَاتِ وَالْمُؤْمِنِيْنَ

وَالْمُؤْمِنَاتِ، اَلْاَحْيَاءِ مِنْهُمْ وَالْاَمْوَاتِ. اِنَّكَ سَمِيْعٌ قَرِيْبٌ مُّجِيْبُ الدَّعَوَاتِ وَقَاضِي

اَلْحَاجَاتِ.

Ya Allah!, Ya Ghaffar! Engkau ampunilah seluruh kaum muslimin dan mukminin sama ada yang hidup ataupun yang telah mati. Ya Allah! Engkau berikan petunjuk hidayah serta rahmat-Mu kepada kami sekalian hamba-hamba-Mu dan kepada pemimpin kami terutamanya Raja pemerintah Negeri Perlis Tuanku Syed Sirajuddin Ibni Al-Marhum Tuanku Syed Putra Jamalullail dan Raja Muda Perlis Tuanku Syed Faizuddin Putra Ibni Tuanku Syed Sirajuddin Jamalullail serta kaum kerabat Baginda, supaya sentiasa beramal dengan kitab-Mu dan sunnah nabi-Mu. Engkau lanjutkanlah usia baginda berdua dalam keadaan selamat, sihat sejahtera dan menegakkan pemerintahan yang adil lagi diredhai oleh-Mu.

Ya Allah!, Ya Rahman! Kami memohon kepada-Mu dengan segala kerendahan diri sebagai hamba-Mu. Engkau indahkanlah akhlak kami. Engkau perbaikilah pergaulan antara kami. Engkau jadikanlah kami umat Islam yang bermentaliti kelas pertama dalam tindakan. Engkau peliharalah kami dari bersifat lemah, malas, berfikiran sempit dan buruk budi pekerti.

Ya Allah!, Ya Rahim! Engkau limpahkanlah Negeri Perlis ini dengan keberkatan, bimbinglah penduduknya kepada amalan soleh yang Engkau redha. Penuhi jiwa kami dengan mencintai agama-Mu.

Ya Allah, berikan pertolongan-Mu kepada saudara-saudara kami yang ditindas di mana pun mereka berada khususnya di Palestin.

رَبَّنَا آتِنَا فِي الدُّنْيَا حَسَنَةً وَفِي الْآخِرَةِ حَسَنَةً وَقِنَا عَذَابَ النَّارِ. وَصَلَّى اللَّهُ عَلَى نَبِيِّنَا

مُحَمَّدٍ وَالْحَمْدُ لِلَّهِ رَبِّ الْعَالَمِينَ.